



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,

Orthodoxorum Medicorum Patrono:

QUÆSTIO MEDICA,\*

CARDINALITIIS DISPUTATIONIBUS  
manè discutienda in Scholis Medicorum, die Jovis undecima  
mensis Martii, anno Domini M. DCC. LXXI.

PRÆSIDE

M. PETRO ABRAHAMO PAJON DE MONCETS, Equite,  
Societatis Litterariæ Catalaunensis Socio, Doctore Medico.

VICES GERENTE

M. JOANNIS CLAUDII MUNIER, Consilarii Medici Regis  
ordinarii & Domus Regiæ Invalidorum, Doctoris Medici.

*An clivi Meudonici situs, ut amœnus, sic salubris?*

I.



EATUS ille qui procul urbis fumo ac strepitu, dulcem  
captat ruris auram, omni solutus negotio; sibi vivens &  
amicis, numerat sine nube Soles. Vides ut surgens sopitas  
aperiat palpebras roseis Aurora digitis, ut variis, quos  
terræ fructibus appingit, oculi recreentur coloribus; ut  
miro avium concentu aures demulceantur, Esurienti dul-  
cius sapit esca, Jovis aurâ spontaneam obsonante famem.

Agrestia nunc, nunc culta percurrit indefessus; naribus blandè favet Ze-

\* *Authore M. LAUR, FÆ RET, D. M. P. an. 1751.*

phyrus, pennâ jocanti mulcens odoratos flores; inde diurnas emensus horas, placidæ dat membra nocti. O nimium fortunatus, si sua bona nôit! Nec tamen rusticationem sua semper merces sequitur; non enim omne rus omnia fert commoda. Terra obnoxia cœlo est. Sæpe plura nitent humi, ubi cœlo plura sordent. Fallit aliquandò soli facies, & primâ fronte salubria incautos decipiunt. Floribus amœnis & pulchrâ fronde subridens arbor vacuum non rarò delusit colonum. Tibi dulce est valere in loco? Situm observa: montium ac vallium dispares fortunæ. Non ubivis circumfluit purus aër, molliter spirant ventî, salubris unda manat. Non benigno quemque locum Sol salutat aspectu. Ut à situ dulcedo loci, sic salubritas.

## I I.

SUNT quos super ardua montis culmina penates instituisse juvat, aquilæ more suspensos; latè prospiciunt ii, hinc fortunati sibi plaudunt. Humiles habitare plagas amant alii, solosque vallium incolas sanos prædicant. Hunc, si juvat umbra & nemorum recessus; illum, si apicem amat campum patiens pulveris atque Solis, si gaudet in fluminis ripâ hospitari, quibusvis rationibus nunquam dimoveas. Oppidi laudat quisque rura sui. Sapiat omnium maxime qui salubre dulci miscet. Tellus depressior imâ latens convalle stagnantibus obruitur undis, aëre libero ac perflato orbatur; aut horret tempestatibus, aut ventis datur ludibrium montis cacumine statio editior. Curvo sub colle degentem coquit acrior Solis æstus. Vapores humidos mittunt sylvæ & frigus opacum: fibras relaxat & inducit humoribus putredinem unda multa circumfluens, aut proximior amnis. Vicinas præsertim fuge paludes, quæ virus eruant & morbos. Nec ventorum sperne rationem; divisum imperium cum elementis habent, sanitatis fortunæ & fata secum vehunt; quorum ortus respice studiosus. Corpus hebetat & solvit plumbeus. Austër, Aquilo firmat & excitat. Affert ille maturam senectutem, longam hic alit adolescentiam. Lethali humidus frigore altius penetrat ab Occidente ventus, ab Oriente tepens & siccus poros referat. Ergò locum capies qui sic subsideat in valle, ut aëra laxum excipiat, vel sic confurgat in collem, ut Sole nec æstuet, nec ventis rigeat. Orienti expositus, clemens experiatur cœlum, mollesque auras frequentius quàm ventos habeat. Sed & aquas observa: ut cœli, sic soli salubris dant indicia. Seu scaturiat è fonte lymphæ, magno seu flumine volvatur, levis & limpida stomacho gratior bibitur & salubrior. Nec verò tantum fluentes aquæ, sed & sponte nascentes herbæ soli indolem eloquuntur. Ex levi enim teneroque solo plantularum sylva pullulans odorosæ siccantesque spargit vapores, cerebro pulmonique peritiles. His gaudenti commodis, si detur simul longos prospicere agros, hujus & mens recreatur, & corpus servatur incolume. Ubi igitur tot & tanta confociata inveneris commoda, ibi securus pone larem.

## I I I.

AD occidentalem Lutetiæ partem, mediâ inter hanc & Versalliarum urbem viâ, secundum meridionalem Sequanæ ripam, collis assurgit qui regiam prætexens viam, ab Occidente desinit in juga Seviânæ, & versius meridiem Meudoni lateri accumbit. Jucundo hujus clivo locus inest, cui ut decus, sic & nomen, elegantia suâ facillè princeps aspectus asseruit. Hic stet contemplator, & avidis oculis mirabili spectaculo inhians, velut è speculâ, rura circumpatentia prospiciat. Non per inane vagatur oculus, locorum tantum exspatiatus deserta, hæc plena tædii; non ex alto præceps cadit in infima nimis, attonitum reddunt caput hæc potius quàm reficiunt; non distanti

nimis limite remota aspeclat, quæ fatigant mentem nedùm recreent. Rident omnia oculis, & animos oblectant; undique rerum ordo, copia, apparatus. Uno aspectu metiris horizontem, quem pictoribus vix tantum fingere fas sit, quantum efficere naturæ fuit promptum; oculi nullibi blanditis acquiescunt. Delicias ruris maritatas artis opibus cerneret, adeò jucundus est, adeò dives vastus ille amœnitatis campus! Sed quid spectatorem moror? Aërias ab Oriente Urbis turrets & populosa suburbia, ab Occidente nemorosos Sanclovii colles & palatia miratur. Miratur & Sequanam qui, ubi vestigales Parisinis Nymphis undas devexerit, fugit ab urbe. Multum salutat litus flucns amnis, alius semper & idem. Nunc medicatis collis Passiaci fontibus allabitur, nunc aspiciet illud Martis monumentum, ubi honesto truncati vulnere, veterani bellatores sanguine emptâ quiete fruuntur; mox aspiciet surgentem à fundamentis, iubente Marte altero, æmulam domum, ubi delecta juvenus militiæ rudimentis informata, discet petere pulchram, per ignes, per vulnera, mortem. Indè prostrans, quasi captus amœnitate loci, curvo tramite laudati collis oras alluit. Insulas circum suspensus ludit aquis, nec, nisi post dulces moras, ad Sanclovium properat. Quid plura? Obsequiosum videre est amnem, obversatam planitiem semilunari circuitu ambire. In quâ quis numeret tot prædia? Quis tot elegantes villas? Hic frequentatum Bononienae nemus, eique adjacentes vicos aspice, nostrates illi Elysios campos & antiqua Regum tecta. Latissima ubique prata, luxuriam segetum, Bacchi munera lustras oculis. Continuis non sine nomine montium jugis, ad amphitheatri normam dispositis, vasta circumferibuntur hæc loca. Talia prospicit locus ille, utrinque pampineis comitatus collibus, plurimâque à tergo sylvâ coronatus. O faustum clivum, inhospitam nuper atque haud tritam tellurem! Sorte dignus eras aliâ: apta ponendæ domo recepta es area; ipse te, *Belvisus*, Sequana, ipsi te colles, ipsa hæc nemora vocabant. Nec operosæ arti tuum debes, nec impensis decus. Quid enim optanti dives denegat solum? Viscera aperias: saxosa sunt. Circum circa fodias: calcem, gypsum, arenam invenire est, egregii fundamenta laboris. Nec deest nuntia lymphæ glareæ; undique scaturiunt rivi. Diceret ad hoc opus gaudentem versari terram, artificum vota superâsse. Hinc cœlo novum se prodit ædificium. Sed ut opificis labor, sic laus ista sint. Quod Medicorum est trahant Medici. Quæ grata, sæpè sunt sana; sed quæ sana, grata magis.

## I V.

JAM quàm multa ferat salubria faustus ille situs, audi. Ad Septentrionem leviter declinas, Solique nascenti obversatus, primis ejus radiis collustratur; undè, roseo sursum elevato humore, purgatus aër, pulmone purissimus trahitur. Spirantibus & ab ortu & à Septentrione ventis perflatur, juvandæ cutis exhalationi perquàm idoneis. Medio collis clivo recumbentis loci siccam temperiem laudes. Ut veniens dextrum latus aspiciet Sol, sic discedens curru fugiente lævum vaporat. Nec ea est vicina montium aut proceritas, quæ Solis geminans incendia, collem faciat æstuosum: libero patenti aëre fruitur; nullo, Orientem versùs, montium objectu ventis disturbati, planities facile ac liberè incumbentes, per campos felicissimè collem versùs excurrunt. Hinc quàm purus aër, quàm abstersus, Sequana, quibus videtur ferri, refrigeratus undis; ad collem, primâ potissimum luce appellit, & incolae recreat. Hæc venti præstant; hæc Sequana, qui solariis ubique expositus radiis, stagnans nunquam, nec citior, leni & æquabili cursu properat, singulis vitæ beatoris usibus & commodis non impar.

4

At quid ego de Sequanâ ? Jucundus collis felici enatas sinu lymphas excipit. Hæ gratæ palato, viscera facile permeant ; leves stomacho , pectoris amicæ, sitim fugant suaviter & explent, appetitum promovent & excitant. Non illæ vel levisimam vasis crustam obducunt, non lentè excoquant legumen, faciles subjecto igne penetrari, faciles nativum frigus resumere. Undis adèd salubribus irrigatum salubre pronuntiare solum quis dubitet ? Quod nî credis, solum explora. Diversis habitatum reperies plantarum familiis, quæ suaves inter se miscent odores, cerebro nervisque gratissimos. His inspiratis, pulmonis fibræ leniter titillatæ roborantur ; sanguini, quovis cardiaco certior, vis additur, succoque digestivo virtus imprimitur, omni pharmaco longè salubrior. Quod tandem certius salubritatis indicium, quàm gaudentes solo vites ? Bacchus amat colles, Bacchus aëris puritatem, & telluris salutiferam indolem nuntiat.

V.

**E**XEGI quæ celebrandi sitûs erant. Hic mentem exhilarant oculorum illecebræ ; cum aëre spiratur, hauritur cum lympa sanitas. Nimiùm ne crede sensibus, inquiet aliquis : loci captus dulcedine, situm salubrem citiùs exclamas. Ventos undique depræliantes, humidos vicini amnis halitus, torrentem totâ die Solis æstus, tu inter sanitatis commoda reposueris ? Qui vigeat inter hæc functionum integritas ? Undique bellum & insidiæ ; nullo non die, nullâ non horâ mutatur loci temperies : vana meticulosi verba ! Clivi recordare situm ; Meudonici montis tectus culmine, Villadavraïque & Sancelovii collibus defensus, quid à meridie pertimescat ? Quid ab Occidente ? Hinc atque indè convallatur locus ; Eurique & Boreæ alternis vicibus expositus, nec præcipitem Africum decertantem Aquilonibus, nec rabiem timet Noti : at urges : rapidi saltem insultus Aquilonis perferendi : hinc tusses, faucium asperitas, alvi adstrictio, suppressio urinæ, frigora, horrores, dolores lateris & pectoris. Hæc fatis, ô querule ; Aquilonis vim lenis Eurus temperat, mulcetque radiis Sol beneficus. Sed quid Boream criminaris ? Siccus ille detergit aëra, frigidoque spiramine mitigat Solis ignes. Nec purum annem incusa, ferentemque dona ne timeas Sequanam ; ut haustu salubrior, sic vapore nullus magis innocuus. Quid plura ? Potiorem nôstine locum ? Est ubi plus tepeant hyemes ? Ubi Syrii æstus leniat aura gratior ? Præsertim Vere, cum tempestas arridet, floribusque conspergit anni tempus herbas viridantes ; dulce ridentem clivum laudabo, dulce spirantem.

*Ergo clivi Meudonici sius ut amœnus, sic salubris.*

Proponebat Parisiis ANTONIUS-LAURENTIUS DE JUSSIEU, Lugdunæus, Doct̃or Medicus Remensis, nec-non Saluberrimæ Facultatis Medicinæ Parisiensis Baccalaureus, A. R. S. H. 1771.

A SEXTA AD MERIDIEM.

---

Typis Quillau, Saluberrimæ Facultatis Medicinæ Typographi 1771.